

# Nua ch'i va per vita e mort

Dar sang: Pli baud ina chaussa caritativa, oz dovri auta professiunlità

■ (anr/vi) La malsogna aids ha dà l'impuls per las midadas en il sector da donaziun da sang. Ier ha il servetsch da donaziun da sang dal Grischun preschentà sias novas structuradas ad ina conferenza da pressa. *Jürg Räber*, il president dal servetsch regional grischun, ha ditg ch'il sector da dun da sang è sa transformà d'ina organisaziun caritativa ad ina organisaziun cun structuradas professiunalas. Anc adina sa chatta quest sector sut il tetg da la Crusch Cotschna Svizra (CCS). Nov è che la donaziun da sang en Svizra è organisada en 13 servetschs regionals ch'èn commembers da l'uniun tetgala svizra. Il servetsch grischun da sia vart è organisà sco fundaziun.

## 10000 donaziuns da sang ad onn

Manadra dal servetsch grischun è dr. *Brigit Brand*. Ils davos onns hajan plirs spitals chalà da prender sang e delegà questa incumbensa a la centrala a Cuira. Uss hajan anc ils spitals da Glion, da l'Engiadina Bassa e dal Partenz servetschs da donaziun. Plinavant collavurian ils spitals da Glaruna



e Walenstadt cun il servetsch grischun. En quests differents spitals regionals vegnian fatgas ad onn radund 3500 donaziuns da sang. Il center da donaziun a Cuira rimnia cun acziuns mobilas en l'entir chantun ed era en las regions vischinantas da Son Gagl anc ina giada 6500 donaziuns. *Peter Bieler* è commember dal cussegl da fundaziun dal servetsch regional da donaziun da sang. El sez

haja gia 76 giadas dastgà dar sang ed ina giada haja el era pudì gidar cun dar magugl: El saja adina stà persvadì da questa moda e maniera da gidar e da solidaritad. Sang na dastgia mai daventar rauba da martganzia. I saja perquai necessari che las donaziuns na vegnian betg pajadas. Era il servetsch da donaziun saja ina instituziun dal utilitad publica e na dastgia perquai betg lavurar per far gudogn.